



---

## Ika-upat nga Dominggo sa Kwaresma Marso 30, 2014

---

### RITO SA PAGESUGOD

P: Sa ngalan sa Amahan ug sa Anak ug sa Espiritu Santo.

K: *Amen.*

P: Ang Ginoo maanaa kaninyo.

K: *Maanaa usab kanimo.*

### Pasiuna ug Pag-abi-abi

Mga minahal kong mga igsoon: Ang kolor karon sa atong kasaulogan mao ang rosas, o biyoleta tungod kay gisaulog nato ang Domingo sa Kwaresma sa Kalipay. Domingo sa Konsolasyon karon. Dominggo sa “*Laetare*”. Gitugot sa Simbahan nga tugtugon ang mga instrumento sa musika, uban sa nindot nga dekorasyon sa simbahan, aron ipadayag kining kalipay nga nagabugtaw na sa gasa sa Pagkabanhaw! Busa atong abi-abihon ang mata’g-usa kanato dinhi diha sa kalipay ug konsolasyon. Atubanga

## Ma-Dominggong Tamdanang Litrhikal alang sa Simbahan sa Kabus sa Diwa sa Bag-ong Ebanghelisasyon

**A**ng Simbahan sa Kabus, pinaagi sa Gagmayng Simbahanong Katilingban, tungod sa birtud sa Kristohanong bunyag, nagapastol sa iyang katawhan isip kahayag nga motangtang sa maskara nga nagtago sa mga mangil-ad nga pamaagi sa kalibutan.

Sa iyang pagpaila kon kinsa kining mga “walay simbahan” ug mga “katoliko sa ngalan lamang” ug ang ilang igo sa Simbahan, ang PKP-II nag-ingon: (16) “Sila mao ang baga nga duot sa katawhang katoliko. Daghan kaayo sila tungod kay walay igong mga pari, mga relihiyoso ug uban pang mga lumilihok sa Simbahan nga motrabaho uban kanila. Ug ang kakulang sa mga “lumilihok sa parasan” tungod man usab sa kakulang sa mga maninimba, sa katesismo ug pag-umol, ang mga butang nga nakapadasig unta sa pagdaghan sa bokasyon sa pag-alagad sa Simbahan. Usa kini ka sirkulo nga nagtuyotuyok lamang.

(17) Kining maong sirkulo ginabungkag na. Ug ginabungkag kini sa mga diosesis ug mga parokiya diin ang mga “walay simbahan” mismo ginahagit sa pagtukod ug ilang kaugalingong

gagmayng katilingban sa pagtoo ug nagasugod na sila sa pagtubag nga mauyonon. Diin man gani kining mga katilingbana giduso sa Simbahan isip prioridad, ang posibilidad sa mas mainit nga partisipasyon sa mga laygo, sumala sa panglantaw sa Batikano II, mas lig-on usab. Ug kon duna man ugali’y kalagsik ang ilang kinabuhi, ang usa ka tataw nga hinungdan mao nga, sa pamatasang etikal sa partisipasyon nga ilang gibansay, mas ilang nabatasan ang mga buluhaton sa popular nga pamaagi sa pag-ampo uban sa mas makanunayong paggamit sa balaang kasulatan, tininuod nga pagsimbang litrhikal, ang pag-ugmad sa katilingban sa pagtoo ug pagpakabana sa mga isyung katilingbanon.”

Karon, kinsa man kaha kining mga “walay simbahan” ug mga “katoliko sa ngalan lamang” nga anaa sa inyong katilingban? Aduna pa bay “sirkulo nga nagtuyoktuyok” lamang sa inyong parokiya? O nabungkag na ba kini? Giunsa niining mga kanhiay “walay simbahan” ug mga “katoliko sa ngalan lamang” pagsulod sa inyong GSK, ug unsa may ilang gipanghimo karon sa inyong katilingban? ■

karon ang mata'g usa ug ingni: Giabi-abi ko ikaw sa kalipay ug konsolasyon!

### **Akto sa Paghinulsol**

P: Mga igsoon, pangayoon nato karon sa Dios ang iyang pasaylo sa atong mga sala, kay ang atong Dios Dios sa Gugma ug Kaaghop.

P: Gipadala ikaw aron pag-ayo sa mga mahinulsolon, Ginoo, kaloy-i kami.

*K: Ginoo, kaloy-i kami.*

P: Gitawag mo ang mga makasasala, Kristo, kaloy-i kami.

*K: Kristo, kaloy-i kami.*

P: Nagalingkod ka sa too sa Amahan aron pag-ampo alang kanamo, Ginoo, kaloy-i kami.

*K: Ginoo, kaloy-i kami.*

P: Kaloy-an unta kita sa Dios...ngadto sa kinabuhing dayon.

*K: Amen.*

### **Kolekta**

P: Mag-ampo kita: O Dios, nga pinaagi sa imong Pulong, nagpahiuli sa katawhan diha kanimo sa paaging katingalahan, ihatag, naga-ampo kami, nga uban sa hustong debosyon ug maikagong pagtoo ang katawhang kristohanon magadali unta padulong sa mga umaabot nga mga solemneng kasaulogan. Pinaagi sa among Ginoong Jesukristo Imong Anak, nga buhi ug hari uban Kanimo diha sa kahiusahan sa Espiritu Santo, Dios nga usa, hangtud sa kahangturan.

*K: Amen.*

### **LITURHIYA SA PULONG**

**Unang Pagbasa: 1 Sam 16:1b,6-7,10-13<sup>a</sup>)**

L: Ang pagbasa gikan sa Unang Basahon ni Samuel.

Miingon ang Diyos kang Samuel: “Pun- a sa lana ang imong sudlanan nga sungay. Adtoa si Jese nga taga Betlehem, kay gipili ko ang usa sa iyang anak nga lalaki nga himoog hari.” Sa

pag-abot nila, nakita ni Samuel si Eliab, ang magulang. Miingon siya sa iyang kaugalingon: “Kini tingali siya ang pahilogan sa Diyos.” Apan miingon ang Ginoo: “Ayawg tan-aw sa dagway ug gitas-on. Gisalikway ko siya. Dili sama ang hukom sa tawo sa hukom sa Diyos. Nakita sa tawo ang panagway, apan sa Diyos, ang kasing- kasing.” Gipaagi ni Jese sa atubangan ni Samuel ang pito niya ka anak nga lalaki, apan miingon si Samuel kang Jese: “Wala kanila ang gipili sa Ginoo.” Busa, nangutana si Samuel: “Kini ra ba ang tanan mong kaulitawhan?” Mitubag si Jese: “May kamanghoran pa, ang naggalam sa mga hayop! Miingon si Samuel. “Ipatawag siya ug paanhia. Dili ta moduol sa kan-anan sa pagpangaon hangtod nga moabot siya. Busa, gipakuha siya ni Jese ug gidala kang Samuel. Pulahon siya, madanihon ang mata ug gwapo. Miingon ang Ginoo: Adtoa, hilogi siya, kay mahimo siyang hari.” Gikuha ni Samuel ang sungay sa lana ug gihilogan siya atubangan sa iyang mga igsoon. Gikan niadtong adlaw, mikunsad kang David ang Espiritu sa Diyos.

L: Ang Pulong sa Ginoo.

*K: Salamat sa Dios.*

### **Komentaryo sa 1 Sam 16:1b,6-7,10-13a:**

Kining maong asoy bahin sa pagdihog ni David isip hari nagahingpit sa mga gisaad ug gitagna sa nangagi diha sa I Sam 13:14 ug 15:28. Gikuha sa Dios ang inisyatiba sa pagpili kon kinsa gayud ang mahimong hari, bisan walay pagpangutana sa katawhan, sukwahi sa kang Saul nga gituboy pinaagi sa popular nga pagpili. Gihulagway si David dinhi nga usa ka pastol sa mga karnero. Usa kini ka hulagway sa maayong pangulo nga moamoma gayud sa iyang panon, sa iyang katawhan.

**Salmo Responsoryo: Sal 23:1-3<sup>a</sup>, 3b-4,5-6**

***Tubag: Ang Ginoo ang akong magbalantay, walay makulang nako.***

L: Ang Ginoo ang akong magbalantay, walay makulang nako. Gipapahulay ko niya sa lunhawng sibsibanan sa tin-awng mga tubig iya kong gitultolan. Gilig-on niya ang akong kalag.

***T: Ang Ginoo ang akong magbalantay, walay makulang nako.***

L: Gitultolan ko niya sa dalan sa katarong tungod sa balaan niyang ngalan. Bisag maglakaw pa ko sa ngitngit nga walog sa kamatayon, dili ko mahadlok sa daotan, kay naa ka sa akong kiliran. Ang imong bunal ug sungkod maghupay nako.

***T: Ang Ginoo ang akong magbalantay, walay makulang nako.***

L: Giandaman ko nimog makaon atubangan sa akong mga kaaway; ang akong ulo gidihogan mog lana; ug nag-awas ang akong kopa. Sa kaayo ug kaluoy nimo gisunod ko sa tibuok kong kinabuhi. Magpuyo ko sa balay sa Ginoo sa tanang adlaw sa akong kinabuhi.

***T: Ang Ginoo ang akong magbalantay, walay makulang nako.***

**Komentaryo sa Sal 23:**

Kining awita adunay duha ka simbolismo: (a) ang pastol, ug ang (b) ang tagbalay. Ang Ginoo ang pinakanindot nga pastol: gipanguluhan niya ang panon ngadto sa sibsibanan nga lunhaw, ug diin ang tubig labawng dalisay. Anaa siya sa atubangan sa iyang panon, nagtultol kanila sa dalan nga walay kuyaw. Gipanalipdan niya ang iyang katawhan. Isip tagbalay, iyang giabi-abi ang mga dumuduaw, niining bahina, ang mag-aawit o salmista, ngadto sa usa ka buhong nga salusalo, pinaulawan ang iyang mga kaatbang. Bisan pa sa iyang mga kaaway, gipili siya sa Dios aron mahimong hari; siya ang tawo sa kabuhong. Duha ka hiyas nga diosnon ang gituga kaniya: pagkaligdong ug pagka-maloloyon. Busa, angay lang gayud nga siya

mopuyo sa balay sa Ginoo!

**Ikaduhang Pagbasa: Ef 5:8-14**

L: Ang pagbasa gikan sa sulat ni San Pablo ngadto sa mga taga-Efeso.

Mga igsoon: Kangitngitan mo kaniadto, apan kahayag na karon diha sa Ginoo. Pagkinabuhi ingon nga mga anak sa kahayag. Ang mga bunga sa kahayag mao ang kaaghop, hustisya ug kamatuoran sa tanang pamayhon. Kamo mismo, pangitaa ang makapahimuot sa Ginoo. Ayaw panggilabot sa mga buhat sa kangitngit nga walay kapuslanan. Maayo pa kon ibutyag ni. Sa pagkatinuod makauulaw kaayo bisan ang pagsulti sa gibuhad anang mga tawhana sa tago. Apan inigbutyag ninyo ini sa kahayag matataw kaayo ang tanan. Ang tataw na mahimong kahayag. Busa, ginaingon: “Pagmata na, kamong nahikatulog. Pangon gikan sa mga patay aron ang kahayag ni Cristo modan-ag ninyo.”

L: Ang Pulong sa Ginoo.

K: *Salamat sa Dios.*

**Komentaryo sa Ef 5:8-14:**

Sa bugno tali sa kahayag ug kangitngit, ang kahayag ang migula nga mananaog. Tungod kay ang mga Kristohanon nakaambit na man sa kahayag ni Kristo, busa, sila usab nahimo nang kahayag alang kanilang nagpuyo sa kangitngit. Ang buot ipasabot sa kangitngit dinhi mao ang matang sa syudad diin nagapuyo ang kailingban nga giugmad ni Pablo sa Efesus. Sa dagkong kasyudaran sa Imperio Romano, kuyanap kaayo ang pag-us-os sa moralidad. Ang mga pagtuis ug bisyo nakatakod na sa kristohanong syudadnon. Apan isip mga anak sa kahayag, kinahanglan untang maabot sa mga Kristohanon ang tanang suok sa kahimtang sa tawo. Mahimo nila

kini pinaagi sa ilang kaayo ug katarong o sa ilang paghatag ug bili sa hustisya ug kamatuoran. Kinahanglang ilang tangtangon ang maskara nga nagtago sa ngil-ad nga mga tinguha sa kangitngit. Madaugon silang motipon sa Kahayag, uban sa usa ka awit nga tingali kinutlo gikan sa mga kasaulogan sa sakramento sa bunyag.

**Ebanghelyo: Juan 9:1-41; o 9:1,6-9,13-17,34-38**

L: Ang Ginoo maanaa kaninyo.

K: *Maanaa usab kanimo.*

P: Ang pagbasa gikan sa Santos nga Ebanghelyo sumala ni San Juan.

K: *Himayaon Ikaw, O Ginoo.*

Samtang naglakaw si Jesus nakita niya ang buta sukad sa iyang pagkatawo. Nangutana niya ang mga tinun-an, “Magtutudlo, kon gipakatawo siyang buta tungod sa sala, kinsay nakasala, siya o ang ginikanan?” Mitubag si Jesus, “Walay nakasala, ni siya ni ang ginikanan. Gipakatawo siyang buta aron ikapadayag ang gahom sa Diyos diha niya. Samtang adlawan pa kinahanglang buhaton ko ang buluhaton sa nagpadala nako. Moabot ang kagabhion, ug wala nay makatrabaho. Samtang nia ko sa kalibotan, kahayag ko sa kalibotan.” Human niyang sulti, miluwa siya ug nagmasag lapok nga gihidhid sa mata sa buta ug miingon, “Lakaw ug panghulam-os sa Linaw sa Siloam (nga nagkahulogag Pinadala).” Miadto ang buta, nanghulam-os ug mibalik nga makakita na.

Nahibulong ang mga silingan ug ang nakakita niya nga nagpakilimos ug miingon, “Dili ba, kini man ang naglingkod dinhi nga nagpakilimos?” Ang uban miingon, “Siya bitaw.” May miingon, “Dili oy, magkamay-ong lang sila.” Apan mitubag siya, “Ako to!” Nangutana sila, “Nganong makakita ka na?” Mitubag siya, “Ang ginganlag

Jesus nagmasag lapok, mihidhid sa akong mata ug miingon, Lakaw sa Siloam ug panghulam-os. Milakaw ko ug nanghulam-os. Karon makakita na ko.” Nangutana sila, “Hain na siya?” Mitubag ang tawo, “Wala ko mahibawo.” Adlaw sa Pahulay ang pagmasa ni Jesus og lapok ug pagpabuka sa mata sa buta. Busa, ang tawo gidala sa katawhan ngadto sa mga Pariseo nga nangutana na pod niya, “Nganong makakita ka na?” Misulti na sab siya, “Gibutangan niyang minasa ang akong mata, nanghulam-os ko ug karon makakita na.” Pipila sa mga Pariseo miingon, “Dili gikan sa Diyos kining tawhana, kay wala siya manumbaling sa Adlaw sa Pahulay.” Apan ang uban nagkanayon, “Unsaon man sa makasasala pagbuhat og milagro nga sama ini?” Nabahin sila ug nangutana pag-usab sa kanhi buta, “Ikaw, unsay imong ikasulti mahitungod sa nag-abli sa imong mata?” Miingon siya, “Propeta siya!”

Wala motoo ang mga Judio nga buta siyang daan unya, naulian sa pananaw. Busa, gipatawag nila ang ginikanan ug gipangutana, “Anak ba siya ninyo? Moingon ba mo nga nahimugso siyang buta? Nan, nganong makakita na siya?” Mitubag ang ginikanan, “Anak siya namo ug natawo siyang buta. Nganong makakita na siya, wala mi masayod. Wala pod mi masayod kinsay nagpabuka sa iyang mata. Pangutana niya; idaran na siya. Pasultiha siya alang niya..” Miingon ini ang ginikanan, kay nahadlok sila sa mga Judio nga nagkauyon pagpapa-hawa sa katilingbang Judio sa tanang moangkon nga si Jesus ang Cristo. Hinungdan ni nga miingon sila, “Idaran na siya. Pangutana niya.” Unya, gipangutana na sab sa mga Pariseo ang kanhi buta, “Sultihi mi sa tinuod. Nasayod mi nga makasasala kining tawhana.” Mitubag siya, “Makasasala siya o dili, wala ko masayod. Nasayod lang ko nga buta ko kanhi ug karon makakita na.” Miingon sila, “Unsay gibuhay niya? Giunsa pagpabuka niya ang imong mata?” Mitubag siya, “Nakasulti na ko, apan

dili mo mamati. Nganong buot mong makadungog pag-usab? Buot ba mo nga maiyang tinun-an?” Unya, giinsulto siya, “Hala, pagpa- katinun-an niya. Mga tinun-an mi ni Moises. Nasayod mi nga ang Diyos nakigsulti ni Moises, apan wala mi masayod diin gikan kining tawhana.”

Mitubag ang tawo, “Makapatingala kaayo nga wala mo masayod diin siya gikan, apan gipabuka niya ang akong mata! Nasayod ta nga dili maminaw ang Diyos sa makasasala, maminaw lang siya sa nagpsidungog niya ug nagtuman sa iyang kabubut-on. Sukad masukad wala pa igdungog nga may nakapabuka sa mata sa nahimugsong buta. Kon dili siya gikan sa Diyos, wala siyay mahimo.” Mitubag sila, “Natawo ka nga makasasala. Karon ikaw pay motudlo namo!” Ug ila siyang giabog.

Nakadungog si Jesus nga ilang gihinginlan ang kanhi buta. Unya, nakit- an ni Jesus ang tawo ug giingnan, “Mitoo ka ba sa Anak sa Tawo?” Mitubag siya, “Kinsa siya, aron makatoo ko niya?” Miingon si Jesus, “Nakakita ka niya ug nakigsulti siya nimo karon.” “Mitoo ko, Ginoo,” miingon ang tawo. Unya, gisimba niya si Jesus. Mii- ngon pa gyod si Jesus, “Mianhi ko ining kalibotana aron pagtuman sa usa ka hukom, makakita ang buta, ug mabuta ang makakita.”

Pipila sa mga Pariseo nga diha sa duol mitindog ug nangu- tana, “Mga buta ba mi? Mitubag si Jesus, “Kon buta pa mo, wala unta moy sala; karon nga miingon mong, ‘nakakita mi,’ nagmatuod ni sa inyong sala.

P: Ang Ebanghelyo sa Ginoo.

K: *Daygon Ikaw, O Kristo.*

iyang katilingban (Alonso-Schoekel). Nagsugod kini ug usa ka milagro nga makahatag ug kahayag ug kabag- ohan, makahimo’g bag-ong nilalang. Ang pagkabuta, o ang bisan unsang matanga sa tawhanong kahuyang, dili usa ka silot tungod sa mga salang nahimo, kondili usa ka kahigayonan sa pagpa-ila kon kinsa ang Dios ug ang iyang mga buhat. Si Jesus ang kahayag sa kalibutan. Nagatudlo siya pinaagi sa mga buhat ug mga pulong; and iyang mga pulong nagahatag ug kahulugan sa iyang mga buhat; ang iyang mga buhat nagmatuod sa iyang pulong.

Sa dihang ang buta nakakita, inanay usab niyang nailhan si Jesus, ang Manluluwas. Unya nabag-o siya nahimong bag-ong nilalang nga bisan gani ang mga tawo wala na dayon makaila kaniya. Natawo siyang bag-ong binuhat sa Dios. Busa dili na siya mo-arang sa katilingbang hudiyo. Kinahanglang palagputon siya o mobiya siya sa karaang katilingban aron mapuy-an niya ang iyang pagkabag-o diha kang Jesus. Nabalhin usab siya ug nahimong susama kang Jesus. Mao man gani nga mitubag siya: Ako man, ang pulong nga gigamit ni Jesus sa pagpaila sa iyang kaugalingon. Niining diwaa, si Jesus karon maoy namulong ug naglihok pinaagi kaniya: siya nagasaksi kon kinsa si Jesus!

Ug ang pagkabalosong niining tanan, sumala sa gipakita ni Juan: ang mga pangulo sa katilingbang hudiyo nanghambog nga dili sila mga buta. Ug mitubag si Jesus kanila: Punto! Tungod kay miingon kamo nga kamo makakita, busa, kamo sad-an!

### **Komentaryo sa Juan 9:1-41 :**

Usa kini ka katesismo ni Juan mahitungod sa pagbunyag alang sa

**Wali: Ang Simbahan sa Kabus, pinaagi sa Gagmayng Simbahanong Katilingban, tungod sa birtud sa Kristohanong bunyag, nagapastol sa iyang katawhan isip kahayag nga motangtang sa maskara nga nagtago sa mga mangil-ad nga pamaagi sa kalibutan.**

Sumadang Mensahe sa mga Pagbasa sa Dominggo	Ang Simbahan sa Kabus: Konkretong Hulagway sa kabus ug sa ilang kahimtang	Mga Puntos para sa Pamalandong/ Panawagan/ Hagit
<p>Ang Simbahan sa Kabus, pinaagi sa Gagmayng Simbahanong Katilingban, tungod sa birtud sa Kristohanong bunyag, nagapastol sa iyang katawhan isip kahayag nga motangtang sa maskara nga nagtago sa mga mangil-ad nga pamaagi sa kalibutan.</p>	<p>Unsa mang mga grupoha sa sulod ug sa palibot sa inyong GSK nga naghupot ug mga mangil-ad nga mga tinguha? Unsa man kining ilang mangil-ad nga mga laraw, ug ngano man nga nagplano sila'g mga dautan? Nabutahan ka ba sa ilang mga disenyo? Unsa may imong mga kasinatian sa pagbutyag sa mga kangil-ad?</p>	<p>Kinahanglan nga ang mga Kristohanon mosukol gayod nga mabutahan sa mga disenyo sa pagka-ako-akohon ug kahakog sa kalibutan. Sa ilang paghupot kang Kristo, sila ang dan-ag sa kalibutan pinaagi sa ilang mga buhat sa kaligdong ug kalooy.</p>

**Padayag sa Pagtoo**

P: Nagatoo ako...

K: ...Sa Dios ang Amahan ang makagagahum sa tanan, Magbubuhat sa langit ug yuta; nagatoo ako kang Jesukristo, ang Iyang bugtong Anak,

atong Ginoo. Gipanamkon Siya sa lalang sa Espiritu Santo, (*Moyukbo ang tanan*) ug natawo gikan ni Maria nga Ulay. Nag-antos Siya sa sugo ni Poncio Pilato, gilansang sa krus, namatay ug gilubong. Miadto Siya sa mga nangamatay. Sa ikatulong adlaw nabanhaw Siya. Misaka Siya sa langit ug nagalingkod sa too sa Dios, ang Amahan, ang makagagahum sa tanan. Mobalik Siya aron paghukom sa mga buhi ug sa mga minatay. Nagatoo usab ako sa Espiritu Santo, sa santos ug Katoliko nga Simbahan, sa pagpasalyo sa mga sala, sa pagkabanhaw sa lawas, ug sa kinabuhing walay katapusan. Amen.

**Mga Katilingbanong Pag-ampo**

P: Mga hinigugma kong mga igsoon, niining Dominggo sa Kwaresma sa Kalipay ug Konsolasyon, dad-on nato sa atong Amahan sa langit ang atong mga kaguol ug mga kasub-anan, ang atong mga damgo ug mga pangandoy. Ug motubag kita: Ginoo, ihatag kanamo ang kalipay sa imong Gingharian.

**T: *Ginoo, ihatag kanamo ang kalipay sa imong Gingharian.***

L: Mag-ampo kita alang sa Simbahan: nga isip Simbahan sa Kabus sa tibook kalibutan, iya untang ipadayon ang pagkahayag tunga sa kangitngit, sa iyang pagpangulo sa tibook katawhan, ilabi na ang mga kabus ug nagkinahanglan, ngadto kang Kristo, ang kahingpitan sa ilang mga damgo ug mga pangindahay. Mag-ampo kita sa Ginoo.

**T: *Ginoo, ihatag kanamo ang kalipay sa imong Gingharian.***

L: Alang sa atong Santo Papa Francisco I, sa mga obispo, pari, diyakono, kanilang nanagpuyo sa kinabuhing konsagrado ug sa tanang gitugyanan sa pag-amoma ug pagdumala sa Simbahan isip Katawhan sa Dios: nga ilang ipadayon ang pagpastol sa mga katawhan pinaagi sa pagtultol kanila sa mga pamaagi sa gugma, kamatuoran, kagawasan, hustisya ug kalinaw. Mag-ampo kita sa Ginoo.

**T: Ginoo, ihatag kanamo ang kalipay sa imong Gingharian.**

L: Alang sa mga lideres sa kalibutan ug sa tanang gitugyanan sa pangagamhanan ug pagdumala sa mga butang sa kalibutan: nga ila untang ipatigbabaw ang kalipay sa katilingban pinaagi sa pagsangkap ug mga kahigayonan alang sa kaayohan sa tanan, ug dili ang tingusbawan sa pipila nga nagpahimulos sa kadaghanan. Mag-ampo kita sa Ginoo.

**T: Ginoo, ihatag kanamo ang kalipay sa imong Gingharian.**

L: Alang kanatong tanan: nga andamon unta nato pag-ayo ang atong mga kaugalingon alang sa Semana Santa ug sa Pasko sa Pagkabanhaw pinaagi sa pagpaluyo ug pagdasig sa tagsa-tagsa, ilabi na ang mga kabataan ug mga kabatan-onan, pinaagi sa pagpaminaw kanila ug pag-uban kanila sa mga dalan sa katarung ug halayo sa mga pagtuis ug mga bisyo. Mag-ampo kita sa Ginoo.

**T: Ginoo, ihatag kanamo ang kalipay sa imong Gingharian.**

L: Alang sa atong mga minahal sa kinabuhi nga milalin na: nga diha sa kapasayloan sa ilang mga sala, maila na unta ang pahulay nga dayon diha sa kasingkasing sa atong Ginoo ug Manluluwas, si Jesukristo. Mag-ampo kita sa Ginoo.

**T: Ginoo, ihatag kanamo ang kalipay sa imong Gingharian.**

L: Alang sa atong mga espesyal nga mga tinguha, sa kahilom sa atong tagsa-tagsa ka kasing-kasing, (*mohilum kadiyot*) .... Mag-ampo kita sa Ginoo.

**T: Ginoo, ihatag kanamo ang kalipay sa imong Gingharian.**

P: Ginoo, nasayod kami nga ikaw lamang ang bugtong tinubdan sa tinuod nga kalipay. Tabangi kami nga mahimong kasangkapan sa imong Kalipay pinaagi sa among pagkamakanunayong pagsunod ug paghulagway kang JesuKristo, ang among Kayahag ug Konsolasyon. Kini among gipangayo pinaagi ni Kristo atong Ginoo.

T: Amen.

## LITURHIYA SA EUKARISTIYA

### Paghalad sa mga Gasa

P: Dayegon ikaw, Ginoong Dios sa tanang kalibutan, kay gikan sa imong kamanggihatagon nadawat namo kining among gihalad kanimo, ang pan nga abut sa yuta ug ginama sa kamot sa mga tawo. Mahimo kini nga kalan-on sa kinabuhi alang kanamo.

K: *Daygon ang Dios hangtod sa kahangturan.*

P: Dayegon ikaw, Ginoong Dios sa tanang kalibutan, kay gikan sa imong kamanggihatagon nadawat namo kining among gihalad kanimo, ang bino nga abut sa yuta ug ginama sa kamot sa mga tawo. Mahimo kini nga ilimnon nga espirituhanon alang kanamo.'

K: *Daygon ang Dios hangtod sa kahangturan.*

P: Mga igsoon, pag-ampo kamo, aron ang ako ug ang inyong sakripisyo dawaton unta sa Dios nga Amahan, makagagahom sa tanan.

K: *Dawaton unta sa Ginoo ang sakripisyo gikan sa imong mga kamot; alang sa pagdayeg ug paghimaya sa iyang ngalan, alang usab sa atong kapuslanan ug sa tibuok niyang santos nga Simbahan.*

### Pag-ampo Alang sa Mga Halad

P: Among gihalad kanimo nga mahinangpon kining mga gasa, nga nagadala ug tambal nga walay katapusan, O Ginoo, samtang naga-ampo kami nga unta makanunayon namo silang santoson ug maihalad kanimo, nga angay, alang sa kaluwasan sa tibook kalibutan. Pinaagi ni Kristo among Ginoo.

K: Amen.

### Prepasyo

P: Ang Ginoo maanaa kaninyo.

K: *Maanaa usab kanimo.*

P: Ibayaw ang inyong mga kasingkasing.

K: *Amo nang gibayaw ngadto sa Ginoo.*

P: Magpasalamat kita sa Ginoong atong

Dios.

*K: Angay ug matarong.*

P: Angay ug matarung gayod, sibo ug makaluwas, kanunay ug sa tanang dapit nga magapasalamat kami kanimo, O Ginoo, santos nga Amahan, Dios nga tunhay ug makagagahum sa tanan, pinaagi ni Kristo among Ginoo.

Tungod sa misteryo sa Encarnasyon, iyang gipanguluhan ang kaliwatan sa tawo nga naglakaw sa kangitngit ngadto sa silaw sa pagtoo ug gidala niya kadtong mga natawo sa kaulipnan sa karaang pagpakasala pinaagi sa tubig sa bag-ong pagpaliwat aron sila mahimong mga sinagop nga mga anak.

Busa, ang tanang mga nilalang sa langit ug sa yuta magaawit sa bag-ong huni sa pagyukbo, ug kami, uban sa tanang mga panon sa mga anghel, nagasinggit, ug sa walay hupay nagasangyaw:

### **Santos**

*K: Santos, Santos, Santos nga Ginoo, Dios sa kagahaman. Puno ang langit ug yuta sa imong himaya. Osana sa kahitas-an. Dayegon ang nagaanhi sa ngalan sa Ginoo. Osana sa kahitas-an.*

### **Pag-ampo sa Eukaristiya**

*(Human sa konsagrasyon, ang aklamasyon:)*

P: Kini ang misteryo sa pagtoo.

*K: Si Kristo namatay, Si Kristo nabanhaw, si Kristo mobalik nganhi.*

*(Sa pagtapos sa Pag-ampong Eukaristiko, ang pari moingon:)*

P: Pinaagi kaniya, uban kaniya ug diha kaniya, gihatag nganha kanimo makagagahom nga Amahan, diha sa kahiusa sa Espiritu Santo ang tanang dungog ug himaya hangtod sa kahangturan.

*K: Amen.*

### **Rito sa Pangalawat**

P: Karon mag-ampo kita sa Amahan,

atong gamiton ang mga pulong nga gitudlo kanato sa atong Manunubos.

*K: Amahan namo, nga anaa sa mga langit, pagdayegon ang imong ngalan, umabot kanamo ang imong ginharian, matuman ang imong pagbuot dinhi sa yuta maingon sa langit. Ang kаланon namo sa matag adlaw, ihatag kanamo karong adlaw ug pasayloa kami sa among mga sala, ingon nga nagapasaylo kami sa mga nakasala kanamo, ug ayaw itugot nga mahulog kami sa panulay hinonoa luwasa kami sa dautan.*

P: Mangayo kami kanimo, Ginoo, nga imo kaming luwason sa tanang dautan. Hatagi kami sa kalinaw niining panahona, aron, tinabangan sa imong kalooy, mahalikay kami kanunay sa sala ug mahilayo sa tanang kasamok, samtang nagapaabot kami nga malaumon sa pagbalik ni JesuKristo, among manunubos.

*K: Kay imo man ang gingharian/ ug ang gahom ug ang himaya/ hangtod sa kahangturan.*

P: Ginoong JesuCristo, nag-ingon ka sa imong mga Apostoles, “Ang kalinaw ibilin ko kaninyo, ang akong kalinaw ihatag ko kaninyo.” Ayaw tanawa ang among mga sala, kondili ang pagsalig sa imong Simbahan ug sibo sa imong kabubut-on hatagi kami sa imong kalinaw ug kahiusa, Ikaw nga buhi ug hari hangtod sa kahangturan.

*K: Amen.*

P: Ang kalinaw sa Ginoo sa kanunay maanaa kaninyo.

*K: Maanaa usab kanimo.*

P: Ipakita ta ang atong panag-inigsoonay.

### **Kordero sa Dios**

*K: Kordero sa Dios nga nagawatang sa mga sala sa kalibutan, kaloy-i kami. Kordero sa Dios nga nagawagtang sa mga sala sa kalibutan, kaloy-i kami. Kordero sa Dios nga nagawagtang sa mga sala sa kalibutan, hatagi kami sa*



*kalinaw.*

### **Pangalawat**

P: Kini mao ang Kordero sa Dios nga nagawagtang sa mga sala sa kalibutan. Bulahan ang gidapit alang sa panihapon sa Ginoo.

*K: Ginoo, dili ako angay nga mokalawat kanimo, apan ipamulong lamang ug mamaayo ako.*

### **Pag-ampo Human sa Pangalawat**

P: Mag-ampo kita: O Dios, nga nagalamdag sa matag binuhat nga matawo dinhi sa kalibutan, hayagi ang among mga kasingkasing, naga-ampo kami, nianang sidlak sa imong grasya, aron kami mamalandong kanunay kon unsay angay ug makapahimuot sa imong kamahalan ug mahigugma kanimo sa tibook nga kasingkasing. Pinaagi ni Kristo among Ginoo.

*K: Amen.*

### **Katapusang Bendisyon**

P: Ang Ginoo maanaa kaninyo.

*K: Maanaa usab kanimo.*

P: Moduko kita ug atong dawaton ang bendisyon sa Ginoo: Tan-awa ang kadtong nagasangpit kanimo, O Ginoo, ug agaka ang mga huyang na; tagai sa kinabuhi pinaagi sa walay pagkaawop mong kahayag kadtong nagalakaw sa anino sa kamatayon, ug dad-a kadtong naluwas sa imong kalooy gikan sa matag kangil-ad ngadto sa kinatumyan sa kaayo. Pinaagi ni Kristo atong Ginoo.

*K: Amen.*

P: Ug ang mga panalangin sa labawng makagagahum nga Dios, ang + Amahan ug Anak ug ang Espiritu Santo, mokunsad unta diha kaninyo ug magpabilin diha kaninyo kanunay.

*K: Amen.*

### **Pagpanglakaw**

P: Panglakaw kamo, ang Misa natapos na.

*K: Salamat sa Dios. ■*

**Ang Simbahan  
sa Kabus,  
pinaagi sa  
Gagmayng  
Simbahanong  
Katilingban,  
tungod sa  
birtud sa  
Kristohanong  
bunyag,  
nagapastol sa  
iyang katawhan  
isip kahayag nga  
motangtang sa  
maskara nga  
nagtago sa mga  
mangil-ad nga  
pamaagi sa  
Kalibutan.**

Ubani si Fr. Ben Alforque, MSC sa Missionaries of the Sacred Heart sa iyang **GOSPEL BREAK**, hamubo apan makalingaw nga video mahitungad sa Ebanghelyo karong Dominggo. Bisitaha ang [gospelbreak.wordpress.com](https://www.gospelbreak.wordpress.com). o pinagi sa inyong smartphone o tablet i-swipe kini nga QR code.

